

PITAR

lokv Lvnyinvbv Siti Jinam

Mintamchonam

Pitar gv Lvnyinvbv siti lvknam si kvvlo lokv kristan richo kunv vdwgv lvgabv mvngla lvkdam talv toku. Soogv lvgingla lvkdam jvnam si oogv mvvlarula tamsar sarmurnv vdwgv kudungkua okv gwngmur singmurnv vdwa mvdarminsu monam lvgabv. Svkvnv mirwk lwktak minsu dula adwkaku am paakunam si Pwknvyarnv gv chinampanam okv Ahtu Jisu Kristo gv jvjvrungnv chinam am gakbwngla nyi dukunv sum, Jisu Kristonyi oogv awv Jisunyi kaakunv nyi okv ninyi bunu vdwgv tamsar kunama tvvkunv. Lvknv gv lvkdum jvnamv yvvbunudw Kristo lvkodv aaku mare vla tamsarnv vdwa lvkrwk sila lvktoku, ninyigv minamv Kristo gv chintola aakur manamv Pwknvyarnv “yvvnyika ngoomu so mvngma vbvritola bunua rimur lokv mvngdin kusvgo vla mvngyadunv.” Vkvnv siti lvknv vdwv Jisu lvkodv aaku mare vla jvjvklvbv maatar alvbv mvvla lvkdu. Hv vbv minjito Jisu Kristo gv aakur kumakv vnam si Pwknvyarnv “yvvnyika simungomu nvpv vla mvngma dunv, vbvritola mvnwng ngv adwnamar gv rimur lokv adu modukubv mvngdu vla mvvla ridu.”

Arwng lokv darlinnam

Mintamchonam (1:1-2)

Kristan bv goknam (1:3-21)

Tamsar sarmurnv (2:1-22)

Jisu Kristo gv aakur kusvlvga (3:1-18)

¹ Jisu Kristo gv pakbu akobv rinu okv ngo Apostol Simon Pitar lokv—

Ngonugv aingbv Pwknvyarnv gvlo tarwkbak yachoknv lamtv lokv okv ngonugv ringnvbaanv Jisu Kristo gv lokv arvdoya choknv mvngjwng jinam vdwlo kumrwksinam gaamv:

² Pwknvyarnv okv ngonugv Ahtu Jisunyi nonugv chinam lokv nonu gvlo akomaring bv anyuaya namv okv sarsopoyo namv doolwk yilaka.

Pwknvyarnv gv gakla okv goknam

³ Yvvdw ngonua ninyigv yunglit okv alvnam baak dubv* vla ngonua goknv, um ngonu chinggv rila jvjvnnv dormo singdunglo singnam lvgabv ogu ogugo dinchi pvkudw ho mvnwng nga Pwknvyarnv gv kairungnv jwkrwa ngonua jitoku.

⁴ Svkvnv lamtv lo hv milvkunam lo arv doya-choknv okv achialv bv kainv amin am jitoku, svbv amin jiku sokv nonu nyiamooku sokv yonwngla mvyakmvchak nam lokv kilin dukubv, okv Pwknvyarnv ridung nga paaming gvvdv kubv. ⁵ Holvgabv vbvrinamv nonugv lvgvlvma lokv nonugv mvngjwng lo alvnam am lwkpwng toka; nonugv alvnnv chingkikpakik nama lwkpwng toka. ⁶ Nonugv chingkikpakik nam lokv saktv nnnvlo lwkpwng toka; nonugv saktvnam lokv himv gnnvlo lwkpwng toka; nonugv himvnam lokv Pwknvyarnv mvngnam am lwkpwng toka; ⁷ nonugv Pwknvyarnv mvngnam lokv kristan pakmi sinama lwkpwng toka; okv nonugv

* **1:3** Ninyigv yunglit okv alvnam baak; Kvggonv kitap lo doodu Ninyigv gv lokv.

kristan pakmi sinam lokv paknama lwkpwng toka. ⁸ Sikvnnv alamai am nonu dинchi svngv, okv nonu gvlo bunua doolwk mobolo, vv bunu nonua ngonu Ahtu Jisu Kristo gv chingkikpakik am nonu gvlo asaryaung more okv chvrv more. ⁹ Vbvritola soogv vdwsı yvvbunu gvlo dooma dudw bunu abwkajek mabv ho nonu kaapa nyomadu okv nonugv kvvlo rimur rikunam am kakkung kunam am mvngpa kuma duku.

¹⁰ Vkvlgabv, ngoogv ajin vdw, nonua Pwknvyarnv gv goknam am okv ninyigv gaknam am doobwng rungubv ritolaka; holvgabv svkvv sum nonu vbvribolo nonugv mvngjwng nam sum vdwloka kayu mare.† ¹¹ Svkvnnv riku lamtv lokv nonugv Ahtu okv ringnv Jisu Kristo gv turbwngjiku karv lo aala dubv Pwknvyarnv jire.

¹² Okv nonu vdvw jvjvrungnv sum adakrungbv hargap pvvla laarwk pvvsudu okv bunua chinpvvla doodu vbvrijvka svkvv sum ngo nonua mvngpa la ribvre. ¹³ Ngoogv turyi dvdv so svkvv vdw sum nonuam mimpa yala miyar yanam si ngoogv tarwkbaknv kudungkua ngv vla mvngsu dunv. ¹⁴ Ngonugv Ahtu Jisu gv nga mindalvpa bv minjinam aingbv, ngoogv so nyejikunv adwnamar sum kayu yiku nvpv vla ngo chinsudu. ¹⁵ Vbvrikunamv, ngoogv siro kokwng lojvka svkvv sum nonu lvgabv mvngpa bvbv sila dubv, ngo vdwgo lvgvlvmabv risv vdw vkvgo rila vvpv jire.

Kristo gv yunglit am kaanv mvnwng ngv

† **1:10** Nonugv mvngjwng nam sum vdwloka kayu mare; Vmalo Rimur lo holunam.

¹⁶ Ngonu Ahtu Jisu Kristo gv kairungbv aasv nga chimu dubv vla mvnammvsubv higu mvnam vdwa mvngging madunv. Ninyigv Kairungv am ngonu nyikdadw lo kaatar lwknam lokv minji doonv. ¹⁷ Vdwlo hv mvngdv okv yunglit nama, Pwknvyarnv Abu gv lokv jito kubvdw ngonu hoka dooto, vdwlo ninyia vlvgo aala Kaiyachokbv Yunglit kunv gv lokv vbv minjila, “Si ngoogv Paknam Kuunyilo ngv, ngo ninyia alvrungbv mvngpu dunv!” ¹⁸ Vdwlo ngonu darwknv moodw lo ninyigv lvkobv doola riyilo, ngonu atubongv awv soogv vlv nga nyidomooku lokv aadu bv tvvtar lwkto.

¹⁹ Vbvrikunamv nyijwk vdwgv doin japgo kunama ngonu alvyabv mvngjwng yaya duku. Nonu svkvnv sum alvjvbv tvvgap suto laka, ogulvgavbolo Sikvnv si mvdurupum aingbv ridu oogv kanvparam lo loung bv arupua lobv hunglwknam apiabv okv nonugv haapoklo arukamchi gv karlumpumbum loung ngv hunglwkdv. ²⁰ Ogubvrijvka, mvnwng gv aolo sum mvnggap tvlaka yvvka Darwknv Kitap lo nyijwk vdwgv nyikrw kaanama atubogv yvvka minbwk jila nyumare. ²¹ Vkvlgavbolo nyijwk vdwgv doin milwk minamv vdwloka nyia mvngnam lokv aamato, vbvritola Pwknvyarnv gvlokv aanv doina nyi vdwgv japyilo japnv vdww Darwknv Dow gv arwnglo doonyato.

2

Tamsar sarmurnv vdw.

¹ Nyijwk mvvnvrnunv vdww nyi vdwgv pingkolo kvvlo lokv aacho toku, okv oogv apiabv tamsar sarmurnv vdwka nonugv pingkolo aare. Bunu vdww mvvkmvrvk nam, jvjvmanv doin mintam nvnga aagvre, okv bunua oogv ringlin kunv Ahtu um minala rire, okv vkvlgabv bunu awv atubogv aolo dvminmabv mvyakmvchak nama laalwk sure. ² Vbvrikwng jvka achialvgonv bunugv gwngmur singmur lamtv lo vngming gvula rire; okv bunu ogu ridudw vkvlvkwnglo, kvvbi nyi vdwgv Jvjvnnv Lamtv am alvmanv bv mvvnam mvvreku. ³ Bunugv kabiotarinv lokv miriukminda la higunai vngji dula soogv mvvula tamsar sarmurnv vdww nonuam boksi minlin la rire. Holvgabv klu lokv lalayikula vjvgobv bunu vdwa Jwngkadaka jinv ngv mvpvripv duku, okv bunugv mvyakmvchak kuji nvngv yumabv uula doyala riduku!

⁴ Oogv rimurnv nyidogindung vdwa Pwknvyarnv yvnyika kayu mabv, vbvritola bunua uyumooku gv kanvparam bolo leetola, * Jwngkadakadw aluv aama dadw lo gobv, bunua paalwk nyala ritoku. ⁵ Pwknvyarnv klugv akunv nyiamookua kayula rimato, vbvridula oogv darwkmanv nyi vdwgv nyiamookua svdwng nga tvvlu jila rimu toku; vbvritola oogv darwkchongjor nama japgola rin v akingo Nua, okv kvvbi nyi kanw mvngchikgo ringlin mvngchik toku. ⁶ Pwknvyarnv Sodom okv Gomorra pamtv am mvyakmvchak la rito,

* **2:4** Kanvparam bolo leetola; Kitap kvgonvlo doodu; Kanvparam lo takpvdu. **2:5** Atk 6:1-7:24 **2:6** Atk 19:24

bunua vmv lokv taayuk jukjuk toku, okv vbv Pwknvyarnvnyi chimabv rinv vdwa ogubv ritv dunvdw um bunua kaagv sinv dubv mvtoku. ⁷ Okv alvnnv nyi go Lotnyi oogv pvvbkaamanv nyi vdwgv gwngmurrimur rigvnam lokv mvngdwk yanv um Pwknvyarnv ringlin jilaku ritoku. ⁸ Oogv alvnnv nyigo bunugv aralo doonamv, bunugv alvmabv rinam am tvvla okv kaala yikula hv aluguya guya mvngdwk yala ridu. ⁹ Okv holvgabv Ahtu darwknv nyi vdwa adwk akunam lokv oquaingbv ringlin svngvdw okv oquaingbv alvmanv vdwa Jwngkadakadw alulo mvrit nam lvgabv arwnglo apv svngvdw um chindu, ¹⁰ yvvdw Pwknvyarnv gv tujupkunam am tvvma yabv okv adwnamar gv dvnwngyonwng lo riming gvvdudw um bunua vvpvre.

Soogv tamsar sarmurnv vdwsu busukano go kaamadu okv mimbo sulaka ridu, okv aolo doonv yunglitnv vdw lvgabvka mvngdv namgo kaatam jimadu; vbmabaybv, bunua nyarjitari la riyadu. ¹¹ Nyidogindung vdww, oogv tamsar sarmurnv vdwa gwlvkyadu okv kaiyanv bvka ridu vbvri-jvka, bunu vdwa Ahtu gv kaagelo yamla min-jimiyo la rinamgo kaamadu. ¹² Vbvritola oogv nyi vdww kudungkua yartak nambv rirungdu, mootum lokv svnwngsvmin anga aingbv laatung la okv pakila rinyato; Bunu mvnvmrvvla ogumvnwng nga mvki dubv ridu bunu mvngchin madu. Bunu vdwa mootum gv svnwngsvmin aingbv mvki riku, ¹³ okv bunu alvmabv rinv lvgabv alvmabv ridu kalamre. Bunugv mvngpu nam lvgabv ogumvnwng am alu gv loung lo ogu

ridudw ho bunugv adwnamar gv nyumchi namv; Bunugv kupnam lamtv mvnwng am himpu sigv dula, nonugvlo lvkingobv aala dvbamtvngham la rinamv nonugv hinyinghiru namgobv ridu! ¹⁴ Bunu yvvnyika mvnggya madu vbvritola randwbajilo rinv nyimv nga mvnggya la ridu; Bunu gvlo rimur sinam lvgabv kano ngv vdwloka nyumchi madu. Bunu agiam anyum dunv nyi am amin lo rikup lwkdu. Bunugv haapok am gumpwng dubv risarsila ridu. Bunu Pwknvyarnv gv beenam arwnglo doodukunv! ¹⁵ Bunu sursinv lamtv nga kayuto okv bunugv lamtv ngam nyeeemu tvku; Bunu oogv alvmanv kudungkua lo rigvla morko gv paanam kudungkua nga alvbv yabv mvngnv, Beor gv kuu Balaam gv lamtv vngkulo vngming gvvto ¹⁶ okv ninyigv svnwngpvcha ngv nyi ako gv gaambv milin jidula nyijwk vdwgv svrudurak la kudungkua ritvkunam am mintor toku. Okv ninyigv rimur kunam lvgabv mintor la ritoku.

¹⁷ Soogv nyi vdwv isi sigung lo sintar kunam aingbv ridukunv, doogumdori gv mibv nam doomwk bv ridunv; Pwknvyarnv bunu lvgabv kanvparam arwngnv mooku go laapv jito. ¹⁸ Bunu vdwv kaimvngsuto okv pvchaaria gaambv mindu, okv oogv alvmabv rinv nyi vdwgv pingko lokv vjakpiak bv kisuk linpinv vdwa adwnamar bv dvnwngyonwng rimurriche lo rinvvngnv dubv vla kupla ridu. ¹⁹ Bunu sijiku kogv lamtv ridung gv nyira bv ridula bunua ajarabi jimu nvpv vla milv la ridu—vkvlgavbolo ngonu yvvdw ogumvnwng nga riyayaku dudw

ngonu oogv nyira bv ridukunv. ²⁰ Nyi vdwv Jisu Kristonyi ringnv okv ngonugv Ahtu gobv bunugv vbv chingku lokv nyiamooku sokv alvmanv gv nyi vdwgv lokv kisuk lindu kula, okv bunu lvkodv rigum yakula ribolo, vkvnv nyi vdwv kvvlo lokv richo yanv amum svnga alvmaya rinvpv. ²¹ Bunua darwknv rinam lamtv nga chimula rimu tvkula, darwknv orto jiku nama bunugv vngkur gvla rimum kusvnga, vdwloka bunua darwkbv rinam lamtv nga chimu manamv alvyago kunyikv. ²² Bunua ogugo ripvdw kaatam namv oogv minjwk minkiuk namv jvjvdu: “Ikiv atubogv bvvnam am lvkodv dvkor siduku” okv “vrik v sokpung mola rijeka eeriung lo durbok dvdv duku.”

3

Ahtu gv aakur kusvnga milvpvnam

¹ Ngoogv ajin vdwv, vjak ngoogv siti si nonuam lvnyinbv lvkunv. Ngoogv siti taknyigo lvknam si nonugv haapok gv mvngnam baangv so mvngdar la prototo nam lvgabv mimpa dvdunv. ² Nonua kvvlogv darwknv nyijwk vdwgv gamchar mincho kunam vdwa mvngpa tvkv vla ngo mvngdu okv Nonugv Apostol vdwgvlo oogv Ahtu okv ringnvbaanv gv orto jilwk kunam um mvnggap dvdv laka vla mvngdunv. ³ Mvwnvg gv atuakebv, anyung anya gv alunyi bunu awgv dvnwngyonwng nam lokv rinv nyi meego kaapa rinvpv vla nonu chirung laka. Bunu vdwv nonua nyarjitarire ⁴okv tvjikao la rire, “Jisu aare vla milv

pvvnamv, Hv aama ai? Hv ogo lokula? Ngonugv abuapa vdwv siyu roku, vbvritola sichingmookua pwkriilo pwknamyarnam dvdv ngv ogumvnwng ngv klu lokv doonv ngv vjaklodvbv hv rak bv doobvdu.”⁵ Bunu klulo sichingmooku okv nyidomooku am Pwknvyarnv gamkigo jirungla pwklin pvnv vla, bunu jvjvbv chingrung tvla okv chimanv aingbv rirungdu. Sichingmooku sum isi agum lo laalinla okv isi lokv pwklinto,⁶ okv si ka isi lokv gvngv rungto, svdwng tvvlu nvnngv aku kunv nyiamookua tvyak toku.⁷ Vbvritola nyidomooku gvla okv sichingmooku gv vjvgv doodunv sika Pwknvyarnv gv gamki kunam akin lokv doodunv, soogv doodunv si vmv lokv gupak la gua modu kubv vla dooduku. Vdwlo Pwknvyarnvnyi mvngjwng mabv doonv vdwa jwngkadaka yikudw okv um bunua nyeetak simu dukubv vla kaachingkaamu la vvpvtoku.

⁸ Vbvritola ngoogv ajin vdw, nonu so angv sum mvngpa mabv riyoka! Ahtu gv kaagia lo alu lookin vla okv hejar anying ngv ogu angusiya nvgo kaama dunv; ninyigv lvgabv soogv anyiv lvyin akinnv.⁹ Kvvgo nvngv vbv mvngnam aingbv, Ahtu Jisu ogugo hv milvpvdw um ridubv haatvgoyula rimadunv. Vbvmayabv, hv nonua lvkobv saktv minggvdu, ogulvgavbolo hv akin goka sitoka vla mvngmadu, vbvritola bunugv mvnwng nga rimur vdwlokv mvngkurla mvngdin modu kubv mvngdu.

¹⁰ Vbvritola Ahtu gv aadw Aluv dvchonv

aanam aingbv aare. Oogv Alunyi nyidomooku aduv tvtak kumabv dula nyere, nyidomooku gv doonyi poolu, takar vdww vmvbw guyakgupakla okv guyok riku, okv sichingmooku gv ogumvnnwng ngvka mvyakmvchak reku.* ¹¹ Sibv rila ogumvnnwng ngv mvyakmvpak rokubolo, nonu ogunv nyi bv riku svngvdw? Nonugv singdung nga darwk nvbv rirung tokuka okv Pwknvyarnv gvlo tulwksula ritoka, ¹² vbv nonu Pwknvyarnv gv aadw Alua kaayala doodubv baapubv aagor monam lvgabv nonugv lvgvlvma lokv rilaka—Alu lo nyidomookuv vmvbw gupak reku okv mvyakmvpak reku, okv nyidomooku gv doonyi, poolu, takar vdww hagula jimwkjimak reku. ¹³ Vbvritola Pwknvyarnv ogugo milvpvdw um ngonu kaaya du: vv anwnv nyidomooku okv anwnv sichingmooku go vv darwkchongjornv naam bv rire.

¹⁴ Okv vbvrikunamv, ngoogv ajin vdww, nonu vkvnnv alu am kaaya dunvdw, Pwknvyarnv gv kaagialo nonu Darwkyachok nvbv okv alvyachok nvbv ritoka okv ninyigv lvkobv sarsopoyo minggv tvlaka holvgabv lvgvlvmabv rilaka. ¹⁵ Ngonua ringnam lvgabv ngonugv Ahtu gv saktv nama alvnnv gamdak am kaato laka, ngonugv aya minsunam Paul Pwknvyarnv gv mvngkimvnglak jinnam am rinvla nonua lvknam apiabv. ¹⁶ Vkv aingbv ninyigv siti lvkyi dwkibv oogv lkwng bv vbvching naala lvkdu. Vbv lvknam lo chinyu manam vkv doodu, um chimapamunv vdww okv

* **3:10** Nyengam reku Kvgonv kitap lo doodu mapa tvlaka; Kvbvi vdwwgv ka doodu Baayuk tvlaka; Akonvlo doodu Mvyakriyak dubv mapa tvlaka. **3:13** Aij 65:17; 66:22; Nyikrw 21:1

kiamkarnv nyi mvnwng ngv Darwknv Kitap am baago—baago nvlo mimurla minam aingbv so siti sum mimurla minji nyadu. Vkvlgabv bunu vdww bunugv mvyakmvchak svnga naalwk sidu.

¹⁷ Vbvrijvka, ngoogv ajin vdw, nonu sum chinro duku. Vbvrikunamv, nonu atubongv hima sulaka, vbvribolo Pvbv chimanv alvmanv nyi vdwgv rigakpanam lokv nonua riye gvla vnggv lamare okv nonu ringlin kunam lokv holu laku mare. ¹⁸ Vbvritola ngonugv Ahtu okv Ringnvbaanv Jisu Kristo gv chingkikpakik namlo okv anyuaya namlo kaiyaya laka. Vjak okv dvbvdwk-ibv yunglitnamv ninyi gvbvka. Amen.

ANWNV GAMLV
Tagin first Bible translation based on TEV (Good News)
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin
Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed